

嘉慶延安府志

延安府志卷五十五

傳錄二

名人

膚施縣

唐

張平高綏州膚施人也隋末爲鷹揚府校尉戍太原爲高祖所識因衆謀議義旗建以爲軍頭從平京城累授左領軍將軍封蕭國公貞觀初出爲丹州刺史坐事免令以右光祿大夫還第卒後改封羅國公永徽中追贈潭州都督

舊唐書列傳
文靖傳

五代

劉景巖延州人爲丹州刺史晉高祖起兵太原唐廢帝調民七出一卒爲義兵延州節度使楊漢章發鄉民赴京師將行景燬遣人激怒之義兵亂殺漢章迎景巖爲留後晉高祖卽位卽拜景巖節度使景巖從事熊皦爲人多智陰察景巖跋扈難制因語景巖以爲邊地不可以久安爲陳保名享利之策言邠涇多善田其利百倍宜多市田射利以自厚景巖信之歲所獲甚多景巖使皦朝京師皦乃言景巖不宜在邊可徙之邠地乃移景巖邠州又徙武勝景巖乃悟皦爲賣地已開運三年景巖罷武勝以太子太保

致仕居華州契丹犯京師以周密鎮延州景巖乃還故里而州人遂密立高允權允權妻劉氏景巖孫女也允權妻歲時歸省景巖謂曰高郎一縣令而有此州其可保乎允權意惡之乃誣其反而殺之長子行琮德州刺史亦被誅次子行謙允權婦翁也爲奏言非劉氏子遂免不誅

五代史本傳

宋

李繼周父孝金明人太平興國三年東山敵侵清化砦繼周率衆敗之殺三千餘人補殿前承旨雍熙中敗末藏等族遷殿直繼周以河都關塞門等砦居邊要遂修築砦城有磨盧家媚咩拽藏等族居近蘆關未嘗內顧繼周夜率

衆襲焚之斬獲甚衆授西京作坊副賜雕戈以寵之大軍討西夏命爲先鋒會繼遷邀戰于路繼周戰却之改西京左藏庫使五年授西京作坊使夏人圍鄜州繼周掩擊却之加領成州刺史尋卒詔邊臣擇其子可襲職者以名聞

陳志

延安老校寶元元年西虜圍延安七日鄰於危者數矣范雍爲帥憂形於色有老軍校出自言曰某邊人遭圍城者數次其勢有迫於今日者虜不善攻卒不能拔今日萬萬無虞若有不測某甘斬首范嘉其言壯人心亦爲之小安事平此校大蒙賞拔言知兵善料敵者首稱之或謂之曰

敢肆妄言萬一言不應須伏法老校笑曰君未思也若城

果陷何暇殺我聊欲安衆心耳

夢溪筆談

張宗顏字希賢延安人補三班借職積官至涇原副將張
俊選爲統領從俊討湖西寇秀州軍校徐明以城叛宗顏
夜襲其城明遁遷御前中軍統制金人攻明州宗顏破其
前軍從俊討李成與成將馬進戰玉隆觀敗之以兵襲擊
淮北遷崇信軍承宣僞齊入寇張俊檄宗顏自泗州爲後
繼與劉猊遇於李家灣大破之猊僅以身遁擢知廬州總
帥事故數百騎至城下宗顏以百騎遇之敵退紹興九年

卒謚壯敏

朱史本傳

韓世忠字良臣延安人年十八以敢勇應募挽強馳射勇冠三軍補進勇副尉宣和二年方臘反世忠以偏將從王淵討之次杭州賊敗而遁世忠至陸州清溪峒擒臘以出轉承節郎時山東河南盜賊蠡起世忠討捕擒戮殆盡康王卽位授光州觀察使世忠請移都長安下兵收兩河時論不從建炎二年帝如揚州世忠以所部從屯淮陽三年帝如錢塘苗傅劉正彥反世忠舉酒酹神曰誓不與此賊共戴天進兵力戰賊敗追擒之皆伏誅帝手書忠勇二字揭旗以賜授武寧昭慶軍節度使兀朮將入侵以世忠爲浙西制置使守鎮江旣而兀朮渡江帝如浙東世忠留江

上截金人歸師金兵至世忠以海艦進泊金山下預以鐵
綆貫大鈎投驍健者明旦敵舟謀而前世忠分海舟爲兩
道出其背每綆一綆則曳一舟沉之兀木窮賊祈請甚哀
一夕潛鑿渠三十里絕江遁去世忠收餘軍還鎮江帝賜
札褒寵建安范汝爲反以世忠爲福建江西荆湖宣撫副
使汝爲平師還置司建康紹興四年以宣撫使駐鎮江金
人與劉豫分道入侵世忠自鎮江濟師勒五陣設伏二十
餘所約聞鼓卽起擊金兵至別將撻孛也擁鐵騎過五陣
束世忠鳴鼓伏兵四起金軍亂勁騎四面蹂躪人馬俱斃
擒撻孛也等二百餘人捷聞以此舉爲中興武功第一六

年授京東淮東路宣撫處置使置司楚州世忠披草萊立
軍府與士同力役夫人梁親織薄爲屋將士有怯戰者遺
以巾幘俾婦人粧以耻之故人人奮厲撫集流散通商惠
工山陽遂爲重鎮金人廢劉豫中原震動世忠謂機不可
失請全師北討爲恢復計會秦檜主和議命世忠屯鎮江
世忠言金人詭詐乞留此軍蔽遮江淮又力陳和議之非
願効死率先迎敵又言王倫交河南地界乞令明具無反
覆文狀爲後證章十數上皆慷慨激切且請單騎詣關面
奏帝率優詔褒答後金果渝盟如其言十一年四月拜樞
密使遂上表乞骸罷爲醴泉觀使奉朝請十三年封咸安

郡王二十一年薨孝宗朝追封蘄王謚忠武初世忠與檜同在政地一揖外未嘗與談嚆義輕財錫資悉分將士賜田輪租與絹戶等持軍嚴重與士卒同甘苦器伏規畫精絕過人今克敵弓連鎖甲狻猊鍪及跳澗習騎洞貫習射皆其遺法也解兵罷政臥家凡十年澹然自如若未嘗有權位者晚喜釋老自號清涼居士子彥直彥質彥古皆以才見用彥直字子溫以父任補右承奉郎調大社令出爲浙東安撫司主管機宜文字乾道二年遷戶部郎官總領淮東軍馬錢糧會大軍倉給糧察給米不如數捕吏寘於理初代緡錢值二十萬明年奏計乃四倍帝嘉之拜司農

少卿權知江州時相密啟換武授鄂州駐劄都統制條奏
軍中六事乞備器械增戰馬革濫賞厲奇功選勇畧充親
隨等朝廷從之八年勾歸文班遷刑部侍郎同列議大辟
三鞠之弗承宜令以衆證就刑欲立爲令彥直持不可議
卒格會當遣使於金帝親擇以往旣至守節不屈金卒禮
遣之遷吏部侍郎改工部尚書以言罷尋知温州首捕巨
猾王永年窮治之杖徒他州奏免民間積逋以郡餘財代
輸海寇出沒大洋彥直授將領土豪等方畧不旬三生擒
賊首海盜爲清奏功進敷文閣學士以弟彥質爲兩浙轉
運判官進龍圖閣學士致仕卒

宋史本傳

彥直六歲從父世忠

八見高宗命作大字卽拜命跪書皇帝萬歲四字帝喜之
拊其背曰他日全器也親解孝宗卣角之繡傳其首賜金
器鞍馬紹興十七年中兩浙轉運司試登進士第調太社
令世忠薨服除秦檜素銜世忠不附和議出彥直爲浙東
安撫司主管機宜文字權知江州時朝廷還岳飛九江家
資歲久隱匿彥直爲搜剔盡還之延綏彥古知平江府至
郡有士人持吏短長投狀以試能否彥古曰此狀汝不能
爲必有吏人爲者其人錯愕卽以實告于是拘吏杖之一
郡以爲神明姓諸通志按
彥古彥質弟

金

龐迪字仲由延安人少側儻喜談兵書習騎射應募隸涇
原路副將破賊有功授保義郎常從百餘騎行山谷遇夏
人數千迪躍馬犯陣敵皆披靡完軍以還擢爲正將張中
孚舉迪權知懷德軍夏人合軍五萬薄懷德城迪開門待
之夏人不敢入因以數千騎突出遂破之斬獲甚衆後改
華州防禦使天眷元年除永興路都總管兼知京兆府徙
熙秦路兵馬都總管陝右大饑流亡四集迪開渠溉田流
民居民各得其所七年除慶陽尹以最聞正隆元年遷鳳
翔尹海陵卽位征歛煩急官吏因緣爲奸迪不加威督而
力役均人情大悅大定初遷南京路都轉運使以省事惜

費安靜爲政徙絳陽軍節度使卒年七十廸性純孝父疾仰天泣禱刲股作羹由是獲安昆弟析家財廸盡以與之一無所取官爵之蔭率先諸姪疾革沐浴朝服而逝金史本傳

元

劉萬鏐延安人至正間授兵部尚書政績最著

舊志

明

張善賈志云洪武中舉於鄉天順間侍書內庭上以其體貌英偉奏對稱旨心嘉之會缺御史上曰是不當爲御史耶卽以善補之巡按湖廣赫然有聲璽書褒異陞湖廣按

察司僉事卒于官

舊志

張詢延安衛人持身清介動以古人爲法授徒幾百人成
化間以監生任聞喜縣丞嘗爲縣輸餉榆林總兵詢鄉人
也爲留羨餘金以遺之詢還貯之縣庫上其事于府後致
仕歸貧不能自存詢處之斯然以壽終

舊志

王章字延憲成化中進士任大理寺副鞠獄平允時稱其
能以同官事逮罪謫高唐州同知蒞政剛果尋陞知州卒
於官同縣高俊以舉人同知汾州剛方明斷九年考績民
遮留不得行又任三年以病歸

通志

梁耀舉人任陽曲知縣累陞四川僉事剖決如流蜀人稱
之致仕歸進階朝列大夫

舊志

沙金延安人從行伍討流賊擒獲賊首累立邊功

馬志嘉靖

陞威茂叅將廉平不苟雅有儒風每日戴星而出寒暑無間每坐至夜分時呼將校講求平蠻機宜以忠勤清慎勉之自奉不務華美去官之日行李蕭然

四川通志

楊宗氣字鍾山延安衛人其先以軍功世其官宗氣少有大志授經書卽能領會嘉靖辛丑成進士授廣吉士久之改給事中半裁峻厲多所建明世宗時爭論大禮上怒廷杖之議謫戍而上怒稍釋乃左遷山西督糧道別釐宿弊擢都御史巡撫雁門等處總三晉軍務振綱飭紀時稱名臣下詔褒錫兼節制四省吏民賴之時中官用事宗氣獨

不附璫人深銜之遂乞歸優游泉石十餘年卒于家著有

寄閒堂霖雨樓書行世勅賜祭葬祀鄉賢

舊志

趙仕字丹山幼負才名與兄瑤丙午同舉于鄉選武鄉縣知縣縣半石田民貧而悍仕盡心撫恤清賦役懸墾田之令民多樂業又倡立文社親爲訓課自是文風丕振有疑獄仕廉得其實欲寘之法富者以金賄仕正色拒之致政歸行李蕭然幾不能給喪殮於里門開五經社知名士多從遊焉著有丹山集

縣志

楊兆字夢鏡御史本深之子弱冠舉於鄉登嘉靖丙辰進士授行人轉戶曹廉介自矢出爲青州府知府再調紹興

案無留牘以卓異遷密雲奏政著邊功晉都御史巡撫順
天貪墨望風解綬尤留意邊防嚴烽燧時訓練軍無虛伍
餉無虛糜陞薊遼總督尋晉南京兵部尚書轉北工部督
修宮殿陵寢節省金錢以千萬計歷兵部尚書兆素知禁
衛兵皆虛名支餉按籍簡稽不避權貴軍政肅然遴選將
才尤當其用加太子太保乞骸骨歸未至家卒兆爲人風
度嶮峻明達國體才兼文武朝廷倚重者數十年計聞遣
官賜祭贈少保

縣志

張世烈字葵亭延安衛人隆慶戊辰進士任開州知州刑
清政簡報最陞戶部主事監關稅分毫皆入於公陞青州

府知府表率僚屬清操益堅加秩叅政所在有赫赫名晉
布政司左布政起召太僕卿終不赴世刻恬退自抑樂與
人善後進學者皆師事之

舊志

趙應震字廉夫少耽程朱之學師馮少墟先生爲及門第
一主太和書院講學遠近皆師事之歸里讀書清涼山寺
購書萬卷執經問字者甚衆應震天性純孝事孀母尤謹
會母卒嚴冬不履而跣歲祲貧益甚弟子有饋之者皆却
之所著有理學彙編四書五經會心編卒後二十年督學
道汪喬年表其墓曰真理學趙公應震之墓

舊志

白希繡字夢山廣施人幼孤伯父撫之成立萬歷丁丑進

士爲魚台縣知縣縣濱運河民苦於濬築希備喻以義民
樂趨事任五年擢吏科給事中丰采稜峻久之出爲叅政
陞都御史巡撫山西墨吏望風解綬建青龍驛城土人立
祠祀之尋致政歸卒于家賜祭葬祀鄉賢

陳志

蕭如薰延安人以父廕百戶歷寧夏平羅叅將所得俸賜
悉給散士卒時簡敢戰者陰厚焉先是都御史党馨部卒
哮拜驕悍難制馨稍裁抑之拜怨望陰畜異志與健卒劉
東陽深相結納舊例營耗減營卒月餉補足時軍難之馨
曰如例拜等乘釁鼓衆以請餉爲名噪總兵張維忠衙擁
入巡撫門殺馨又殺兵備道石繼芳維忠自縊是時諸路

守將皆奔走降附拜推東暘爲首分置私人守諸路惟如
薰守平羅城不下設帝位榜赤心報國字集軍士泣諭以
大義妻楊氏太保兆女也亦出簪珥以饗士於是一軍感
激拜來攻如薰射殺之東暘氣奪旣而總督魏學會檄延
綏蘭州兵至督師李如松以宣大遼左兵至浙江巡撫常
居敬以浙兵至卒討平東暘者如薰之功居多賊平以功
陞寧夏總兵如薰好義潔已善撫士卒敬賢下士以故人
樂爲用佩大將軍印者九都督京營兵者三好持重不輕
戰以爭一時之利如薰之督京營也駙馬萬某梁某素驕
貴抗法久之爲如薰所化皆重如薰如薰好學能詩賦善

書以經術濟武功爲一代名將家居喜怒不形王世貞袁
宏道陳繼儒王穉登皆相友善如薰祖漢父文奎兄如芷
如蘭如蕙皆總兵一門號將才忠義著於朝廷縣志
岳可延安衛人有將才歷官大同副將屢有戰功世宗嘗
揭其名于屏左曰朕之岳可卽宋之岳飛也卒於官

趙彥仕之孫萬歷癸未進士歷官都御史巡撫山東平妖
賊徐宏儒有功進兵部尚書加太子太保崇正間歲荒輸
粟賑貧活人甚衆彥爲人沉敏有智畧臨大事屹然如山
所著有籌邊畧今燬縣志

姚衍中字欽印弱冠以文名太守張子忠器之決其必售

省試度期當報捷置酒城樓上語同儕曰佇俟姚子捷音已而果售衍中事親孝色養數十年如一日課誦昆弟寒暑無間居鄉醇謹言動循禮法一時士大夫宗之未仕早

卒

縣志

趙章字俊字彥之弟以國子監生官光祿署丞居家孝友輕財好施遇歲歉出粟活人甚多教訓諸子皆成名廣印歷官兵部員外郎隆印固始縣知縣清廉愛民因公卒于官固始縣立祠祀之廷錫順治辛丑進士廷嘉貢生歷官戶部員外郎

舊志

岳具仰延安人弱冠舉于鄉當事者以邊才由教諭擢知

四川廬州晉戶部員外時值黔南安彝之變廷論授兵備使乃不辭難以身自許每敵必先登屢立奇功後兵潰被圍猶手刃數賊矢盡而死事聞贈光祿卿蔭一子

舊志

王撫民延安衛指揮使祖敏河西千戶撫民承襲守靖邊時苦多盜摘發如神姦宄肅遏累遷保河遊擊綏禦有方略萬歷元年遷紫荆叅將旋推石門副總兵尋改涼州涼州逼處番回撫民至募勇敢三千日訓練待敵常率所部突其圍敵披靡遁去涼州以安十四年遷都督僉事鎮守陝西嵩山逋寇爲亂至撲滅之火篩聞風不敢犯邊者數年十七年遷右軍都督同知名還京屢疏乞歸許之未幾

復起鎮守山西尋以病卒

通志

杜桐字來儀延安人任本鎮總兵以謀勇著稱首功至一千八百官右都督文煥字發武桐之子時套警方嚴自寧夏總兵還本鎮戰多捷以事謝去崇正二年大盜混天王等掠延川米脂清澗諸縣復起爲總兵勦之三年邊盜苗登務嘯聚于安定文煥擊敗之王嘉引降復叛去走皇甫川引套人入寇文煥從孤山進擊大破之四年賊首神一魁據保安招套中千餘騎爲亂文煥與賀虎臣合軍圍之遁去文煥三任榆林賜飛魚寵盛無比子宏棧官池州總兵部伍肅然爲一道最自桐及宏棧三世總戎當代稱爲

將家

延綬志

國朝

姚廷璉字華商衍中子六歲孤母李苦節撫之讀書廷璉性至孝卽奮勵力學日夜誦不輟同郡尚書趙彥大奇之妻以少女母卒哀毀尤至以明經官山東東平州同署本州印務年餘勸農興學民賴以安當遷秩以請獨浮賈言過激忤上官遂拂衣歸里庚辰辛巳歲大饑罄資糴谷以貸貧者妻趙亦慨然曰吾不惜脫簪珥以成君志全活甚衆明年盡出其券焚之順治乙丑王永強叛陷延安我兵進討廷璉從行間都轉輸寇平以功委知保安縣力請編

審除浮丁以蘇民困邑人尸祝之年六十一卒以子給諫

祖頊貴贈奉直大夫工部屯田司主事

陳志

趙廷錫章之子順治十八年進士歷官天台良鄉二縣皆

有善政內陞中書科中書歷戶部湖廣司主事所著詩文

年譜遺稿甚夥祀鄉賢

縣志

王令順治八年選拔考授汝州州同清白自矢陞定州知

州理煩劇絕逢迎都人士有冰心鐵面之謔時窩逃連坐

之律甚嚴百姓不免流徙令視事每遇逃人諭彼自首戒

勿妄扳一歲中緝逃百餘案未嘗株連一人境內多盜令

擒獲殆盡州賴以寧陞戶部員外郎轉刑部郎中諫鞫明

允多所平反出考廣東驛鹽海防道上官重其才疏請督
師勦賊粵東大盜滋蔓勢甚熾令監緝軍紀以時進勦督
撫上其功卽陞按察使己未春奉命領海折界令會同
歷查邊海並無出境營私之民保全者數百萬家當時力
肩鉅任勞瘁成疾辛酉告歸卒于家子吉人監生保舉任
浙江温州府太順縣知縣卒于官

縣志

趙廷嘉拔貢歷任山東東平州知州陞戶部員外郎廷嘉
官孝豐縣時政績最著當時有五不朽十三善政之頌
趙松以貢生任直隸薊州知州當時民歌之曰趙薊州惠
田疇惠出隣民何憂又歌曰薊州趙豐爲兆薊州來歲不

災歷署磁州永清寶坻豐潤永年鉅鹿南和諸縣事俱有

循績

縣志

安塞縣

明

宋惟中字守正正德中以監生任新都縣主簿禦賊有功
擢徐溝知縣及卒知縣梁君高其行私謚曰貞惠先生以
子蒞貴贈奉直大夫

通志

張毅字宏道爲諸生建里學課鄉子弟朔望集鄉人更考
善否勸戒必行一時相勉爲善甚多知府聞名徵之三辟
不就爰謫其弟戍雲南始受徵任廬州府知府府大治作

治平萬年書上之上曰以廬州之治治天下何有真治世
名臣也方欲大用遽卒樞還無所有僅載一石上鐫賢良
方正四字

陳志

馬如龍任彰明陵川縣知縣皆有美蹟致政還入里趨過
廟下溫恭端慤邑人化之訓誡後嗣其子懋才任湖廣副
使懋華膺歲薦任商州學正家庭之內義方肅然時稱萬
石君邑大饑出粟千石貸之存活甚衆鄉人高其義焉

馬懋才天啟乙丑進士官禮部主事時邑大荒餓殍盈野
乃抗疏請賑上依奏遣按臣吳賁帑金十萬給散流離者
粥救活甚多歷官湖廣岳州副使卒于青門鄉人德之順

治九年祀鄉賢著有嵐淙草焚餘詩草行人酒令行世

縣志

甘泉縣

後梁

高萬興唐進士唐末昭宗播遷河西郡縣盡屬李茂貞茂貞將胡敬璋爲延州刺史萬興與其弟萬金俱事敬璋爲騎將敬璋死其將劉萬子代爲刺史梁開平二年萬子將許從實殺萬子自代茂貞不能討萬興兄弟率其部下數千人歸梁梁太祖兵屯河中遣州忠義軍節度使劉知俊以兵應萬興攻丹州進克延州執其刺史檻送河中乃以萬興爲延州刺史號忠義軍節度使屢遷檢校太師兼中

書令封渤海郡王貞明四年萬興卒遂以其弟萬金爲鄜
延節度使進封延安郡王萬興兄弟皆驍勇而未嘗立戰
功然率衆歸梁梁因得取鄜坊丹延諸州地故加恩其弟
與子令世守其土子允韜亦唐末登進士唐室亂從父自
延州歸梁梁太祖愛其才使隨父分守延州地貞明中屢
遷至開府儀同三司仲子允權亦從父兄守延州後領延

州節度使

通志

後周

邠益縣東素修鄉人後唐明宗時以守邊功歷官彰武軍
延州都督入周遷銀青光祿大夫檢校太子賓客兼殿中

侍御史

通志

元

蒲庸字時中留西里人至正中進士官城固縣知縣興利除害民懷其惠爲立生祠於斗山之麓歷官至御史中丞趙溉至正中以薦舉起累官吏部尚書清介不阿爲一時

名臣

通志

明

開濟字來學洪武初舉人材授河南府訓導陞國子監助教以疾歸十四年御史大夫安然薦濟有吏治才召爲刑部尚書綜覈功過規定課程決遣軍民罪犯滯獄一清帝

以爲能又議奏取士科條從之創造之初凡經制田賦工
殺河渠等事授濟裁畫悉有條理品式以是甚見信任數
備顧問

縣志

楊榮永樂間舉人官御史彈劾不避權貴卒以直諫忤成
祖挂冠歸里

舊志

石瑩玉字崑岡弱冠名籍甚登崇正庚辰進士官曲沃縣
知縣清操自勵未閱一考以薦擢兵部車駕司主事瑩玉
見國事自非不復仕居家孝友躬課子孫歲饑出粟賑貧
鄉人德之卒祀鄉賢

縣志

國朝

石之玟瑩玉季子少穎異過目成誦登順治戊戌進士官
湘鄉縣知縣以外艱歸服闋補睢寧詳免淪湖荒地錢糧
民慶更生睢寧當黃河之衝之玟累著勞績陞桃源河務
同知兼攝宿桃屯河同知防禦險工清理屯地河督靳輔
稱之遺疏舉薦卽擢河南府知府值母憂起補徽州府後
調福州後以望悞後晉河工委任卒於淮之白洋河

縣志

延安府志卷五十六

傳錄二

名人

保安縣

宋

胡子常保安軍人嘉祐間率族人與西夏戰有功進三班

奉職

通志

劉紹能字及之保安軍人世爲諸族巡檢父懷忠官內殿崇班閤門祇候元昊屢以金幣及王爵招之懷忠斬其使迫入寇力戰以歿錄紹能右班殿直尋破夏右樞密院党

移賞糧數萬軍於順寧夏人圍大順城紹能爲軍鋒毀其
棚至柰王川邀擊於長城嶺熙寧中又敗之於破羅川功
最累遷洛苑使英州刺史鄜延兵馬都監元豐西討名詣
闕神宗訪以計對曰師旅遠征儲備不繼爲大患若俟西
成因糧深入乃可得志帝以爲然命統兩軍進討紹能世
世邊將爲敵所忌每謗書至帝獨明其不然手詔云紹能
戰功最多忠勇第一此必夏人謗忌爲閒害計耳紹能捧
詔感泣嘗坐譏違對按驗卒無實守邊四十七年大小五
十戰以皇城使簡州閤練使卒

延綏志

劉延慶其先西夏熟戶世爲將知名後居延安府爲保安

軍人屢及夏人戰政和八年攻藏底河拔之宣和二年從
童貫討方臘遣子光世自將一軍趨衢婺破之定二州累
遷檢校少保節度使六年伐燕山爲都統以軍三十萬取
易州屯盧溝河命郭藥師楊可世輕兵先趨燕山光世爲
後繼契丹蕭太后密召四軍大王兵自暗門入藥師等驚
駭光世又不至諸軍失援而潰延慶坐削官久之乃復金
人圍京城延慶守北壁出戰有功及城陷與子光國率衆
開萬勝門走百姓多從之聚於瓊林苑不帝數十萬延慶
率衆直西以進金軍逼滿原野衆不敢行延慶呼光國激
之口汝以五十騎往以堅軍民之心光國揮戈馳驟而去

延慶曰光國五十騎尚能進况軍民數萬皆死命乎乃率之而趨遇金人鐵騎縱橫衝突衆皆星散延慶及光國皆死焉次子光世字平叔初以磨補三班奉職累陞鄜延路馬步軍副總管靖康元年夏人乘閒寇杏子堡敗去擢侍衛馬軍都虞侯金再攻汴京光世入援進屯陝府別道趨虢遂至濟州謁康王爲五軍都提舉王卽皇帝位命爲省視陵寢使尋爲提舉御營使司一行事務行在都巡檢使斬山東賊李翌平鎮江叛兵討張遇於池州又追擊於江寧二年以功加檢校少保命討李成光世以王德爲先鋒與成遇於上蔡驛口橋敗之成收散卒再戰光世以儒服

臨軍成遙見白袍青蓋併力躍之德潰圍拔光世以出再戰皆捷帝在揚州金騎擒王長帝倉卒渡江命光世爲行在五軍制置使屯鎮江府控扼江口尋檢校太保殿前都指揮使苗劉爲亂呂頤浩遣使至鎮江說之乃引兵會於丹陽兵進光世以選卒爲游騎仍分軍殿後遇苗翊馬柔吉軍於臨平與韓世忠等破之至行在遷太尉御營副使隆祐太后在南昌命光世移屯江州爲屏蔽光世旣至日置酒高會金人自黃州渡江凡三日無知之者太后退保虔州光世自信州引兵至南康鄺瓊圍固始縣光世遣人招降之又遣王德擒妖賊王念經於信州時光世部無

所缺號太尉兵名赴行在授浙西安撫大使知鎮江府光
世言別除守臣得專充安撫使從便許增辟通判光世慮
金人過江故預擇便地右諫議大夫黎確劾之帝釋不問
加寧武軍節度使開府儀同三司以遣之時金兵留淮東
楚州被圍者已百日帝手札趨光世救援者五竟不行止
遣王德鄴瓊將輕兵出時奏殺獲而已楚州破命光世節
制諸鎮力守通泰完顏昌屯承楚光世知其衆恩歸欲攜
貳之乃鑄金銀銅錢文曰招納信寶有欲歸者叩江執錢
爲信歸者不絕因剋奇兵赤心兩軍昌遂拔砦去紹興元
年金人渡淮真揚州皆闕守命光世兼淮南京東路宣撫

使置司揚州措置屯田迄不行張浚討李成又命光世分兵往舒蘄搗其巢穴光世以江北盜未平爲辭命兼淮南宣撫使領真揚通承楚州二年復命移屯揚州時至鎮江視師光世不奉詔呂頤浩奏光世軍月費二十萬緡乞差官考覈詔御史江躋度支胡蒙至軍點校終不得實帝方倚其成功尋詔兩漕臣措置鎮江酒稅務助其軍費又罷織御服羅省七百萬緡以助之加寧武寧國軍節度使三年命光世與韓世忠易鎮同名赴闕世忠至鎮江城下姦人入城焚府庫皆云世忠所遣光世以聞帝遣使和解命爲江東淮西宣撫使置司池州賜錢十萬緡劉豫將王彥

光揚兵淮上有渡江意光世扼馬家渡追鄺瓊屯無爲軍
爲濠廬拔賊乃退金人劉豫入侵時光世張俊韓世忠權
相敵且持私隙帝遣侍御史魏玘至軍中諭以滅怨報國
光世始移軍太平州以援世忠金兵退光世入覲遷少保
帝曰卿與世忠以少嫌不釋然烈士當以氣義相許先國
家而後私讎復諭以光武分寇恂賈復之事光世泣謝請
以所置淮東田易淮西田給事中晏敦復言其擾民而止
又請并封其三妾爲孺人南渡後諸大將封妾自此始劉
豫挾金人分道入侵命光世屯廬州以招北軍與韓世忠
張俊鼎立張俊入對言光世驕情不戰不可爲大將乃遷

護國鎮安保靜軍節度使石司諫陳公輔劾其不守廬州
張浚又言其沈酣酒色不恤國事語以恢復意氣怫然乞
賜罷斥光世引疾請罷軍政又獻所餘金穀於朝拜少師
充萬壽觀使奉朝請封榮國公賜甲第一區以兵歸都督
府初光世麾下多降盜素無紀律至是督府命呂祉節制
其軍鄧瓊遂殺祉驅諸軍降劉豫十年金人圍順昌復拜
光世爲太保三京招撫處置使以援劉錡進至和州秦檜
主罷兵召還爲萬壽觀使改封楊國公卒贈太師謚武僖
乾道八年追封安城郡王開禧元年追封鄜王光世在諸
將中最先進律身不嚴馭軍無法逋寇自資建炎初結內

待康履以白固與時浮沉不爲秦檜所忌故能竊寵榮以

終其身方之韓岳遠矣

延緩錄志按志所錄畧同宋史本傳而事績較詳今仍之

解元字善長保安軍人起行伍隸韓世忠麾下擢偏將世忠出下邳金兵大至士皆駭愕元領二十騎擒其生口俄逢騎數百身自陷陣橫刺酋長墜馬餘皆遁去苗傅劉正彥之變從世忠追賊擒於浦城金人攻浙西世忠以海艦橫截大江金人出小舟以長釣扳艦元躍入敵舟以短兵擊殺數十人擒其千戶授統制前軍討閩寇范汝爲轉討湖外諸盜時劉忠據白面山元率兵五四面並進賊平改州州觀察使紹興四年金人僞齊合兵入侵元屯承州遣

百人伏要路百人伏嶽廟自以四百人伏路隅金人走城下伏發進退無路元追獲四百八十人時城中兵不滿三千金萬戶黑頭虎造城下元徵服出僞若降者金人稍懈俄伏發擒黑頭虎金兵四集元戰却之從世忠出下邳以數百騎破敵伏兵授保順軍承宣使畧地淮陽騎三百當敵騎數千元揮戈大呼轉戰自辰至午敵退成列而還進保信軍節度使

宋史本傳

楊仲武字德威保安人父遇以勇聞關西爲宥州團練使宋末仲武謁經畧使王庶用爲先鋒婁室入關與鄭建充俱降爲環慶路兵馬都監皇統初復陝西將兵戍鳳翔屢

却宋軍除知寧州關中薦饑境內盜賊縱橫仲武悉平之
遷同知臨洮尹改同知河中府臨洮地接西羌與木波雜
居邊將貪暴木波苦之遂相率爲寇掠仲武前治臨洮從
數騎入其營諭之羌人喜悅寇掠遂息至是木波復掠熙
河主帥使人諭之不肯去詔復遣仲武及至責以負約對
曰邊將苦我今幸見公願終身不復犯塞乃舉酒酹天折
箭爲誓仲武因以卮酒飲之羌人羅拜而去大定三年除
武勝軍節度使改陝西西路轉運使卒

金史
本傳

安定縣

明

李廷彥萬歷甲戌進士授邯鄲縣知縣有政績陞雲南道
監察御史大理司右少祀鄉賢初居寧夏後居揚州故鄉
行治績皆失傳

縣志

薛文周字晴嵐七歲能屬文入鄉校從知縣邱雲肇遊學
問益進弱冠登萬歷丙辰進士選山東濰縣知縣政多宜
民一介不取調掖縣亦如之兩邑各爲建祠擢吏科給事
中危言正論多所建白劾逆璫魏中賢事載要典時忠諫
之士俱罹禍文周歸葬父母至永寧州卒囊無長物祀鄉
賢縣志文周陝西延安安定人矢志淡泊令掖縣辭家領
一蒼頭之任主僕日給米二升餘給貧老後堂戶不謁曰

吾蕭然一身印隨身文卷在案何用關防寒天無煖耳鄭
官家宰趙煥饋一煖耳周曰太宰以此辱我愧謝不遑欲
解綬去歷五年如一日入覲神宗擢文周天下廉吏第一
賜宴以風百僚授吏科彈惡不避權貴歸家卒於永寧署
年四十五行李止奏議數卷俸金十兩

龔倫法戒
廉潔類

郝建中字維特天姿明粹自少研心理學以六經爲本講
學四十餘年文章氣節一時宗之

縣志

梁棟字伯材安定人家長安登萬歷丙辰進士知秦興縣
倭寇猖獗棟練兵守禦倭不敢犯告終養歸子九賦萬歷
癸酉舉人知西充縣疏鹽課之累民爲立石

長安志

周國柱萬歷中官寧夏總兵二十年有奇功

舊志

白鍾靈字長庚天啟丁卯舉人任河南鄆城縣知縣有神君之頌募民兵敗李自成陞兵部職方司主事未任值自成猖獗改名清歸隱著有經書說約論孟泰看寄寄集損益篇詩稿惜皆失傳

縣志

白啟泰字惕若父早世事母孝以拔貢生任江南淮安府通判淮四面水鄉多盜賊啟泰甫下車嚴城池稽保甲戒夜行除奸剔弊政聲大著監造戰船三載有勞績以病乞

歸

縣志

王發祥字琪生卓犖不羣慷慨有大畧設教榆林城適朱

延安府志

卷五十六

八

逆變亂巡道其稔知發祥有猷爲共商守禦策晝則監散
賑饑夜則巡視城垣無少曠事寧以守城功延安府學教

授縣志

國朝

任在陞字鼎鉉剛毅有志節少值離亂備極艱難銳志讀
書中順治戊子副榜累官北直隸平谷縣知縣縣素凋瘵
又旗民雜處號難治在陞廉介自持極意撫綏務抑強禦
暴權貴歛跡政聲丕著遇覃恩請封典曰得此稍可盡子
心遂致仕優游林下三十年官師鄉里皆矜式屢膺鄉飲
大賓享壽九十歲子麟振邑明經沉重簡默有古人風以

忠厚世其家

縣志

南芹字蘭友天性孝友才學德行一時無兩未冠父爾強病且劇晝夜飲泣侍左右父知止之曰吾生不愧天死歸耳哭何爲父亡與妻石氏悉力事母家貧每奉饌必匿諸幼於他所不使分其甘也兄藻病焚香露禱祈以身代藻子建勲性魯鈍朝夕課誦不解則仰天呼兄淚與聲俱如是者十年率成立初藻將終暗授三十金命作撫孤費芹存其金爲權子母至金二百勲等成立悉付之一無所私己卯舉于御詣京有欲致力爲仕進地者不應優游林下十餘年凡居家居鄉之道皆足爲後學法

縣志

宜川縣

明

張琛成化乙未進士授行人歷吏科都給事中剛方沉毅廉潔有守彈劾不避權貴疏數上皆切時獎陞太僕寺少

卿尋卒祀鄉賢

縣志

劉繼貢生卓犖不羣慷慨多大畧善騎射正德間任盧氏縣知縣時大盜劉六劉七等攻城掠邑無堅不摧繼先期歛民入城堡四境獲全復領本邑募丁夜襲破賊義聲一振緣山伏竄少壯皆執戈而從獲賊首輜重以軍功上於朝會疾大作而歸卒祀鄉賢

縣志

劉子誠字伯明幼有至性潛心經史嘉靖甲子舉於鄉與
溫恭毅砥行明經一時老師宿儒翕然宗之子誠爲學既
綜六經又精群經尤於周子肯說通書抽關啟鑰之妙每
上公車考東觀遺闕遐俗異語者三十年己丑同考官楊
啟元擬元與他房陶望齡爭或因北卷欲置第二楊不平
憤置之曰斯人道學淵懿議論瑩徹非吾曹所及因刊其
卷布長安自是退講於鄉隨人淺深皆有成就終身不見
喜怒一日臨觴不樂謂弟子誠曰學無體用便分性命物
理爲二吾學雖未見用然繕性治世放諸百世無疑也弟
度設施可澤於斯人便可出而仕矣尋卒學者尊爲大劉

夫子祀鄉賢

縣志

張堯行字丹坡與兄堯輔苦志好學堯輔舉於鄉堯行舉明經並歷縣令州牧俱著廉聲陞邵武府同知致政歸立家塾家庭自相師友五世同居督學旌其門堯行知忻州時禱其城不勞民力先是刺史有德政白鶴翔飛久而不去至是白鶴重來人以爲瑞祀名宦

縣志

劉廷珣繼子貢生嘉靖初任延津縣知縣承天之役所過郡邑無一獲全廷珣預置高樓凡飲食供帳先以號帖投諸司必諸司遣人至樓下驗號帖乃給之一時上下皆得飽食上嘉之手書一等官員額其縣堂廷珣祖父多陰德

冬掃溝雪數十里以便行人還遺金二百於其商至今積

德之家必以劉氏爲稱首

縣志

劉琛宏治壬戌進士四川重慶府推官歷官按察使僉事

所至多政績與弟琰璽號三劉云

縣志

劉琰成化辛卯舉人任汝陽縣知縣當時稱爲循吏

縣志

劉儒字以聘性至孝父嘗倉卒被盜儒與兄倬自外踰垣

入爭求代父於是盜義之釋其父嘉靖間以舉人官安縣

知縣歷陞叙州府同知所至皆有惠政遷慶藩左長史以

禮繩正王不聽遂致仕歸爲學以誠一爲本辨析理義毫

忽不苟學者爭師事之稱橋麓先生常正己率物危坐竟

夕衣冠必整太保楊兆出其門既貴每見猶傳立終日語人曰吾侍兩宮未若先生嚴也生平不近倡俳雖賓祭亦弗接於前著有劉氏家禮橋麓集子光文以明經知招遠縣寬和宜民擢判真定有出金內官監採爲民害光文奏劾內官因罷採金役一時權貴憚之

縣志按劉儒郡志作中部人父子兄弟皆

有傳通志作宜川人祇載儒一人而附其子光文於後然鄉舉內不載未知何據俟攷

劉子鍼字叔貞子誠弟讀書國學校湖廣訓導教士以不欺爲本立行藝二格有一善者記之行勤誦讀者記之藝月得數人以爲老友習容請禮童冠仰焉督學道董其昌聞之嘗聘入幕擢鹽山令陞橫州知州持節定交趾之難

所至皆有治績後卜居青門與崔爾進文翔鳳等結耆英社有洛下遺風生平雅度過人寵辱不驚著有杖履三篇尚書遺旨二卷

劉漢客字石生宜川人順治甲午貢生少倜儻英邁博極子史爲文深奧右卓詩歌書法皆絕人性剛方不容人過然樂與人談詩文及古今興廢娓娓不倦交遊盡一時名宿嘗與修陝西通志所著詩文多行世

縣志

延長縣

金

張閭八世不異爨男女百餘口兄顯卒以家事付侄聚聚

辭曰叔父行也宜主之閨曰侄宗子也宜主之讓久卒以
付侄縉紳家自謂不如事閨奉勅旌其門萬歷十一年
知縣王嘉柁考祀入鄉賢祠

縣志

元

王旻性至孝事親色養不怠父敦崇道教年八十卒旻哀
毀骨立殯葬如禮廬墓三年鬼神爲之感通大定間事聞
奉勅旌其門嘉靖十三年知縣雷潔建坊萬歷十一年
知縣王嘉柁考祀入鄉賢祠

縣志

明

周衍廣安里人家貧九歲尚牧羊不與羣兒伍惟嬉戲習

禮別長幼一日隨父至縣見邑令行香乃問如何得做官
父答曰讀書衍歸告父曰兒願讀書父猶豫衍不食復泣
請始命就學後登永樂丁丑進士授尚書郎以才能稱出
爲黃州府知府儉以率屬治行著聞秩滿當遷引疾歸居
鄉謙退開塾延師訓里中子弟間親爲課督後進景仰之

縣志

劉肅廣安里人自幼闔戶讀書足不履市補邑庠以經明
行修辟舉於廷授刑部主事平反者績歷官有聲與權謀
不協引疾歸里

縣志

郭泰俊次子易弟母生時父夢門貼昌泰二字遂名泰幼

勤學勸兄易讀書兄輟耕問字舉永樂乙卯鄉試歷任山東東昌府知府居官廉介能斷異事著斷案三十餘篇秩滿乃曰吾父昔夢昌泰而生今已應之可歸里矣告致居

鄉醇謹稱賢

縣志

趙亨字達字李城里人自幼孝友著聞清操自勵應賢良方正舉歷任工部主事封父彥承德郎告養歸里一如儒素萬歷十二年知縣王嘉祐考祀入鄉賢祠

縣志

蘇景泉安平里人幼習舉業以貢授山東濟南府通判在官以廉能稱甘於恬退引疾歸里訓子弟皆顯於時嘉靖間套虜入寇奉檄修建縣城泉同千戶麟占督工以石易

土公私不困鄉人德之分巡道方公遠宜給匾旌獎知縣
張旭陽立碑志之

縣志

徐方貢邑生員天性孝友且能文母病侍湯藥禱以身代
母喪哀泣不食葬身躬執畚鍤負築廬墓三年除夕門人
送酒餚貢以祭母墓夜半聞鬼泣聲呼母應之方已邑令
王嘉柟以孝廉薦於臺省命給冠帶貢辭曰冠紳非分所
有惟願儒巾終身萬歷二十五年知縣考請王嘉柟祀名
宦貢入鄉賢祠師生同日奉祀士論榮之

縣志

薛之奇字翕鉉薛子里人事母孝數齡知定省病卽嘗藥
母歿泣繼以血葬祭如禮鄉黨以孝稱撫七歲幼弟之鳳

親授教讀爲聘娶成立不分費由拔貢銓衡州府通判歷
署郴州宜章常寧三州縣事以清謹題荐特加服俸一級
後以採辦陵木卒於涪州囊橐蕭然累贈按察司副使康
熙十九年知縣孫芳馨詳祀鄉賢祠

縣志

薛之鳳字冲鉉翁鉉弟少失怙恃依兄撫養事之如父比
之苛卒於官入蜀搬櫬歸里悲泣不輟莽服外猶衣素兄
乏嗣以子柱斗承繼後已不再出亦不收回惟以侄名之
以先人蓄積賑戶戚貧乏間與券焚之以子貴移封天津
道按察司副使同兄之奇入祀鄉賢

縣志

國朝

樊鳳冲生稟穎異一目十行崇正年拔貢時闖逆僭號羅致鄉里咸汙偽命冲逃匿荒村得免

本朝定鼎詔有司徵辟固辭不仕讀書終老享年八十餘歲知縣張三異題其堂曰士林傑品

縣志

孫可望李城里人幼有大志明季歲荒盜起流落不偶至郡宿城外龍王廟夢神語曰走走望南走可望異之遂往河南張獻忠見而奇之養爲子任以帷幄獻忠歿遂領兵南踞雲南我

朝定鼎携家投誠勅封義王時本縣令舒暢陳包丁包糧之疏可望面奏

諭可截減縣網人民復業里人建祠立坊以報之縣志
薛柱斗之鳳子之奇嗣子初之鳳禱於岳口廟夢神贈以
玉環遂生幼穎悟由拔貢初任安陽縣丞歷陞安徽巡撫
政績有聲又篤念桑梓里中百廢具舉皆柱斗所創造也
歲己未

樂與南巡

欽賜蟒衣一截未幾陞刑部侍郎執法不同貴戚飲跡以老
告休囊橐蕭然子晉任江南淮揚道就養卒於官縣志

董文獻恩貢生好義輕財有曹姓負銀無償以子立約抵
還文獻姑納之代爲撫娶一日喚曹姓於書舍促子媳拜

之曰此汝之子媳可領回曹威然辭謝獻曰前爲汝病姑
留之此時約已焚矣何辭爲人皆義之時逢鼎革未仕子
漢賈漢維俱以歲貢授訓導康熙八年知縣舒暢旌其門

縣志

延川縣

明

高懷敬延川人洪武中以人材起家歷官有能名累遷湖

廣按察副使

明一統志

洪武間以人才薦舉任北平府照磨尋

陞湖廣按察司副使建文中視職永樂初召復原官請京
陛見憐其老賜勅准致仕歸里恪遵勅諭教訓子孫勸鄉

民子弟爲善邑人化之者多後世思之祀鄉賢

縣志

李表由貢生嘉靖間任山東建化縣縣丞歷北直沙河縣

知縣服官廉介一毫不苟祀鄉賢

縣志

靖邊縣

隋

王世積新國人今靖邊縣地父雅周使持節開府儀同三司世積容貌魁岸腰帶十圍風神爽拔有傑人之表在周有軍功拜上儀同封長子縣公高祖爲丞相尉迥作亂從韋孝寬擊之每戰有功拜上大將軍高祖受禪進封宜陽郡公高祖美其才能甚善之授蘄州總管平陳之役以舟

師自蘄水趣九江與陳將紀瑱戰於蘄口大破之以功進位柱國後數歲桂州人李光仕作亂世積以行軍總管討平之進位上柱國遼東之役世積與漢王並爲行軍元帥至柳城遇疾疫而還拜涼州總管令騎士七百人送之官未幾其親信安定皇甫孝諧有罪吏捕之亡抵世積世積不納由是有憾因微幸上變由是被殺入朝接其事竟坐

誅

隋書本傳

國朝

黃喜林鎮靖堡人生而膂力絕人雍正中歷官四川重慶鎮總兵隨總督年羹堯征青海賊人羅布藏丹金奮勇先

登凡十五日青海平喜林功居多以功襲拜他喇布勒番
三次尋卒孫世俊襲爵官甘肅橫城營都司

縣志

延安府志卷五十七

傳錄三

孝義

膚施縣

明

陳七兒延安衛人遠戍邊思每日夜號泣恍惚見關帝云
閉目騎馬尾不移時至家驚臥方寤與母會泣訴卽詣官
自首未幾母卒號哭不食負葬隴間剪蓬成廬時時哀號
墓側日月之夕哭聲慘悽行路聞之多歔歔泣下廬墓者
三年奏聞其事永樂十年勅立石坊旌表

劉友得早孤事母孝母病衣不解帶數月及卒廬墓悲癯有兔馴擾泉水湧出人以為孝感所致奉勅旌表

張信父卒哀毀踰禮既葬廬墓三年正統九年旌表

薛廣延安衛人幼喪父其母周氏撫養成立廣性至孝知色養母病醫藥弗効廣齋戒懇禱竭誠格天母遂愈後母年八十卒廣哀慟不食三日既葬廬于墓正統十三年旌表其門

趙用事親菽水盡歡居喪哀號毀瘠甚戚友至不能識里人稱純孝焉

楊女勲縣學生太保兆長子太保告歸至壽陽終汝勲徒

步跌足執紼至縣廬墓三年屏絕酒肉築墳建塋讓金吾職于弟汝業孝友兼美焉

趙志常敦行好善力農積粟歲荒餓殍載道出粟千石以賑又煮粥全活甚衆勅賜冠帶勒石旌表

楊如桂延安衛人字德馨孝奉寡母母歿哀毀骨立喪祭如禮教幼弟成立家產盡讓不分任山西陵川縣知縣壽八十六卒

賈國桂縣學生母病割股獲愈孝著鄉閭崇正十六年有司表其門

國朝

光前性至孝母早逝哀毀骨立幾不欲生家貧教授生徒罄束修所入供繼母甘旨惟謹舉明經授德平縣知縣清慎慈惠每遇疑獄必詳讞曰蒼鷹乳虎爲世所痛吾忍蹈之乎時邑多逃人大爲民害光前曲全甚衆絕不株連以病卒於官櫬歸邑人士執紼泣送數百里

左斗光性至孝事兄克謹甘苦與共凡廩餼館課所入俱公之無私藏篤志力學雅敦古誼一時士大夫咸器重之以明經筮仕翼城縣知縣多惠政縣人稱爲真父母口碑載道比遷秩當去士庶攀臥遮道涕怨不忍離知許州益著循績興學勸農剔奸釐弊百姓戴德焉

党應龍字正中光前孫性純孝早失怙恃每言及輒涕泣
哀慕之情終身如一日幼卽發憤讀書通經史于集屢試
輒冠軍以數奇薦而不售者再與從兄孟龍同炊榆林總
兵李聘爲子師所得束修悉寄從兄囊無私蓄歸家不問
其出入雖屢空淡如也晚年客屯留縣幕亦如之書法撫
董趙詩以唐人爲宗所著古文詞甚多制行高潔知府徐
延爲書院山長年六十六而終

趙楠字錫君幼聰穎家貧苦志力學弱冠舉于鄉四上公
車不第性至孝親歿水漿不入口數日居喪哀毀過禮幾
至滅性遂感疾服甫終而卒子任士以明經貢于鄉亦未

仕卒

朱漢祐字雲標歲貢生事親孝待其弟泗沂友愛居鄉言動不苟衣冠必正雖盛暑不袒裼都人士咸欽其方正官甘州學博訓士謹飭以嚴見憚諸生欽模楷告歸卒于家李文忠字雲章廩生性孝事親色養父卒奉繼母恭順得其歡心撫養弱弟教誨兼盡爲之成室立業縣中重其行以明經歲薦年七十未仕卒子楷舉子鄉

閩熙臣縣學生居心仁慈嘗延安定白紹李課子知其貧助金以娶康熙辛丑歲大飢花馬池饑民王姓者以困急鬻女子娼熙臣出貲贖歸後嫁良民族弟有義女欲許人

爲妾而女不悅熙臣善爲勸諭已其事又民安有福通金八十不能償熙臣爲之焚券其善行類如此子碧亦至孝十四喪母哀毀踰禮未冠補縣學生事父及繼母克盡子道一日櫃內失物繼母以碧私匿數譖于其父熙臣廉知後妻轉移母家欲出之碧再四泣請百方勸解乃止厥後繼母感化卒爲賢母所生幼弟碧爲之成室後又失偶不能再娶碧又竭貲借貸以續之鄉黨族人咸欽其孝友焉聞榮家貧父母老有殘病榮以力農事其親多方娛悅務得其歡飲食必親造之否則必親驗之然後進雖未讀書頗知禮義二弟幼弱榮撫養成人皆完其室父母樂常語

人曰得一佳兒可無庸多子矣厥後其親享大年相繼而
殁榮藉之得宜三年不赴酒筵不入私室縣人稱之

閭朝宰延安衛人以販烟爲業馱烟至安塞侯家澗啟視
烟槽內藏銀百兩意必烟主所藏賣烟時偶忘之急携銀
回家見烟主正以失金理訟于官朝宰慨然出銀還之烟
主驚異因感謝曰若非君仗義吾同夥俱殆矣後縣尊葉
公表其門

閭騰武學生四世仝居克敦孝友學使者表其門

以上俱
縣志

安塞縣

元

王思聰素力田農隙則教諸生得束修以養親母喪盡哀
父繼娶楊氏事之如所生以家多幼稚侵父食別築室曰
養老堂奉之朝夕定省父嘗病劇思聰憂甚拜祈於天額
膝皆成瘡得神泉飲之愈後復失明思聰舐之卽能視縣
上其狀命表異之

元史本傳

明

韓景陽幼以孝名既長眷戀膝下頃刻不違晨昏定省天
性純篤任順天府照磨惓惓庭闈一日念親甚卽謝事掛
冠歸里娛親盡孝其父母相繼以天年終廬墓泣血哀毀
骨立立品端介誘進後學每多顯名著有燕山稿望雲集

經亂焚失

何林家貧賣薪事母值荒爲傭得錢務求悅口者供母母
惑稍黷百計娛之及母卒負土營墳饑臥未竟行人過之
見多人負畚鍤修築因叱曰林何倩人築墳衆忽不見林
驚寤幾然成墳蓋神助也今名築墳臺離城三里鄉人立
孝子碑見存

袁應秋貧不能自立每爲傭所得直自奉母外悉周濟頗
連者其母得不起疾日夜號泣願以身代及母疾愈乃負
母共朝武當山往返不憚勞瘁始終致孝閭邑感之爲碑
以誌其孝其辭曰傭工飯僧似分喂鵠之豚戴母朝天有

同冰臥之苦云云

以上俱
縣志

甘泉縣

明

來承恩生員於階子於階歿後乃生母趙氏守志承恩事
之至孝其先墳石碑上忽現山水花木形遠邇聚觀嘉靖
年旌表孝行

石天縉主事瑩玉父富而好義天啟崇正間代賻里中丁
差賑恤貧病鄉人感其德焉

國朝

李枝榮廩生煥仲子煥赴省試客死長安枝榮甫六歲聞

廷安府志卷五十七 孝義

六

之日夜號泣年十三獨往尋父骸滴血驗真奉以歸墓哀
慕終身不渝

開宏周東川澗溝人慷慨豪邁康熙二十年間知縣黃詳
請豁免包賠丁銀宏周匍匐入都懇求改正得如所請里

黨推重舉爲鄉飲賓

以上俱
縣志

保安縣

明

劉俊父母逝泣血三年不飲酒茹葷不窺家園及葬以矜
包土築塋邱壠高聳隱若山阜萬歷中旌表

舊府志

馬忠由賢良方正任山西道御史有孝行父母歿廬墓三

年

李端父仲福疾端割股以進疾愈久之父卒端居喪僻踊日一飯惟菜羹事母羅愈謹食必親進母歿合塋廬於墓側墓地高燥乏水端仰天哀籲地忽泉湧有白兔馴擾廬側人以爲孝感成化年旌表

胡國賓庠生守成禦賊城破趨歸家衛其母持利刃當門手刃二賊遂遇害

王孫宏拔貢生聞賊臨境知縣邱某授宏督理城守及賊陷城投崖而死

劉彰本貢生赴京授涇陽教諭闖賊入京彰本縊死涇陽

會館

薛裕義氣磊落賊陷城巷戰不息賊愛其勇不忍殺環圍欲降之裕厲聲曰我薛裕也豈向賊求生活哉遂殺之

國朝

郝澄涇遇父母有疾額天泣代及親歿每食必獻一如生前至老不懈奉

旌表

以上俱縣冊

安定縣

明

李壯丁兒虜大至壯丁兒從父母奔避山谷卒與遇虜縛

母去壯丁兒取石擊母得脫前行復遇五騎一騎下馬還縛母其母呼曰壯丁兒但逃命勿顧我壯丁兒不忍手提鐵骨朵擊仆一虜母逃得生四騎圍壯丁兒斫碎之名山錢景大有縣學生天性孝友母病割股服之果愈里人稱孝

舊府志

南金縣學生孝行失傳

李光裕字文泉廩生父恭早逝母景氏遺腹生裕景氏撫育有道十六入鄉校甘貧守分事繼祖母郝氏母景氏克盡孝道郝氏壽七十五景氏壽七十三當事者屢旌表其門人皆曰孝子節婦無過此家

史元相歲貢生官鄆城縣教諭素性朴醇居家孝友親死
廬墓三年鄉人稱之

郭永治字清所縣學生崇正末守瓦瑤堡賊已入城永治
手執門扇率衆禦之賊乃退巡城被流矢中左股衆驚譁
永治手折箭桿神色不動曰無傷也人心乃定賊凡數至
捍禦有方城賴以不陷至今德之

國朝

南爾強字遜之康生有至性六月喪母方歛慟幾絕父撫
之曰汝爲死母獨不爲生父乎哀稍輟殯既朔望必至荒
郊展拜事繼母尤篤孝諸季欲分爨罄產讓之父士達將

就延試積貲三十金一夕被盜去復稱貸以進不令父知盜感愧還金遺之去終身不洩也父卒尤孺慕不衰雍正九年題旌從弟爾輔字長民性孝謹事親色養由貢生任金縣訓導

史秉鑑字敷平明末盜起父任耀州學正秉鑑馳省途遇賊泣告曰吾往省父願見父來就死賊釋之父歿爲諸生始食餼曰此天家所以造士也以佐菽水之資可乎仍率諸弟子力耕以奉母以外大父無子復迎養以悅母志一門之內融融如也每出行經溪山崖谷必下車駢曰母命也其舉念不忘多類此年七十由歲貢授渭南司訓垂十

年還里舉鄉飲年九十乃終雍正十年旌表

孫榮桂性慷慨好施予戚黨中依以爲活者甚衆歛暴骨施醫藥建廟七所卒日送喪者五百餘人康熙六十年歲大歉有過門興歎者曰使榮桂在吾等不至此子宏志貢生宏道國學生

李華字中州縣學生三歲生母楊氏亡越數年父又卒值兵變時發華奉祖父母克盡孝道祖父母年皆八九十獲抱代孫里人稱之及祖母卒華已寢疾柩行戚友俱曰有子代可勿送恐號泣傷華也曰我與祖母更相爲命今日永別何可不臨穴耶卒口神而還病益沉逾月遂卒人皆

嘆賞其孝焉

南爾輔字長民士昌次子貢生官涇陽縣訓導才學夙優工書法事親色養燕居侍立不問不敢對奉湯藥旬日不解衣享壽八十三歲

景曰都字廣揚縣學生年十一孤母子鬻子無依因銳志讀書知縣王公滙甚器重之講授經義爲名諸生事母至孝年七十五歲係鄉飲大賓子孫知名者甚衆

南瑤字蘅蘭貢生五歲卽解定省禮七歲父亡母撫之讀書苦學有文名設館教授學者多從之事母孝凡事先意承顏務得歡心撫孤姪源泓成立縣令旌其門復爲鄉飲

大賓其子源澄源倚俱以孝聞善事繼母鄉里稱之奉

勅建坊入祠

南蕙字梅友貢生爾強仲子剛方峭直不以嘖笑假人事
親則愉愉若孺慕奉食必嘗受教必跪居父喪及胞兄亡
號痛幾絕以母故勉節之與弟藻芹篤友愛共饗食貧四
十年無幾微不相睦者撫兄孤盡成立司訓漢中以實行
勵諸生飯蔬暖水澹如也善楷書卒於官

郝秉秀字挺生年七十事母孝謹晨昏必趨拜膝下母止
之每日晨起必屏氣肅容向母戶叩祝母壽

李桐孝友子諒鄉黨著聞父母年俱耄盡榻終身孺慕不

衰友于尤篤每事必肩其難者季弟早世桐撫其婦子衣食必先孤寡而後已

王璉九歲值母病湯藥必親夜不假寐母卒事繼母尤恭謹母子俱有令名教子姪以孝經小學爲根柢閱史鑑得忠孝大節及陰德事則手書一編示之其他敬老慈幼敦族睦隣尤篤行君子也

石又賢諸生家貧甚幼時過里塾聞誦書聲輒欣然不捨父異之令從舅氏學初授以孝經退輒語人曰吾能是及長弟肖先方五歲輒呼至學中同臥起告以懷橘扇枕等事弟一日觸母怒戒之曰吾語汝謂何弟大沮悔由是不

敢復忤母母亡毀甚父亡毀逾甚得咳血疾時肖先已前卒又賢知不起語家人曰吾兄弟繼逝不獲親視之穴俾吾父有子而無子天乎何酷言訖而終聞者皆掩涕雍正十年旌表

楊方康熙辛酉舉於鄉授長安教授性孝友弟正病股者三載母念弟不能遠離欲挈弟至長安慮方不能兼顧因不至方命妻子奉母於家與弟至學舍訪國醫治之藥餌俱親調餽飽寒煖樽節之如嬰兒見者咸爲感動聞母喪卽日就道諸生追唁不及縉紳間尤重之

郭泰家極貧性至愚陋衣服襤褸而目塵垢人因以癩娃

呼之然獨解孝道事寡母李氏承顏順志每飯不忘爲儒學斗役間得餒餘肉汁則曰小人有母持以歸又每日必覓錢五七文買麵餅奉母遭荒年妻及二子俱餓死母以泰乞食得全生年八十以壽終雍正六年閭縣公贈匾曰孝行可風

張羽採字儀九篤於宗族由貢生歷任同慶郡學博致仕歸推所積俸與子姓中貧乏者有冠婚等事輒復周濟嘗慨然曰昔范文正公設立義田爲族人久遠之資吾人難萬不能効法昔賢奈何竟置宗族於度外哉優游林下二十年享壽八十有七病將革猶囑其子輩曰族人皆吾高

曾之壽也當善遇之詩有之孝思不匱永錫爾類採其庶幾乎其他言坊行表亦皆足爲後學楷模

孫宏澤性至孝孺慕終身方齠齡父有足疾醫者曰此脫疽也毒入骨罔治若欲愈以口噉去其毒卽淨口噉之血汗溢齒頰旁觀者皆嘔伊毫無難色疽尋愈人皆爲孝心所感旣冠以色養又嘗爲親築精舍於室之西隅培植花卉扶二老盤桓其中膚施知縣郭公朝佐至安定聞其行與本縣董公一薰潛造其廬適其父携諸生賞花飲酒郭公謂其父曰此君家真樂也遂贈坊額曰宜園董公贈坊額曰鳳樓相與嘆羨而去與伯兄宏毅相友愛伯兄病親

事湯藥兄歿事嫂甚謹撫其子續敬先已子入府學父母終致哀盡禮廬墓三年縣人稱之乾隆五年奉

勅建坊入祠

王良一字靜彭泰寧里孝一甲民狀貌奇偉天性孝友少失恃善事繼母其繼弟兌一父歿時甫離襁褓良和淚撫育卒至成立嘗自城市歸道拾遺布一大卷訪還其主尤好調宗族鄉黨乾隆元年舉鄉飲膺耆賓十一年奉

勅建坊入祠

史頊字伯揚府學生天性孝友甫五歲父秉鑑奉祖母饌卽知潛避他所不分其甘旣長事親以色養父年九十苦

足冷寢則臥于足下懷抱其足以溫之有所往則以某日
至某所告覓之果如其言伯兄穎早亡以次子纂德承嗣
德與已子染豆症俱危焚香祝曰德乃兄子也願殤已子
後果殤已子而德愈他如賑濟族人沾丐戚屬咸能體親
心以爲子年既耄里人欲以其孝白于官力辭之曰孝道
余所甚愧諸君勿重余罪其自掩其行有如此者乾隆二
年以孫侍衛榮贈奉政大夫

楊鼎字錫九孝友性成父成在生四子鼎其仲子也父家
貧俱未令讀書鼎長乃力耕以攻二弟讀後悉爲縣學生
已得入國學父歿廬墓三載先是母歿以父故未獲廬墓

勅建坊入祠

至是期以六年親友屢謂塋以典禮力規之乃歸然終身
至慕祭拜卽號痛欲絕若赤子之失慈母者乾隆七年奉
白鶴濯字塋王康生性至孝自少卽能以色養其親生平
沉默寡言笑一若愚者獨至庭闈聚談應對盡期悅親心
與弟鵠浣最友愛鵠濯母亡卽欲廬墓以父故未獲父歿
乃率子姪輩築室塋側於課讀暇卽舉先人行狀以示疾
革語其子曰吾行得與祖父母團聚矣遂含笑而逝
史纂欽字青若生有性長而彌篤年十六典身塋父族人
感泣贖之母得瘞疽漲膿不發纂欽親吮之尋愈母歿後

親朋燕會俱不赴召其子或具酒肉必磨之有終身之慕焉

強允中字協方縣學生其先世以孝友傳家而允中尤篤母嘗疾屢醫罔效而兄亦以足疾居家允中遂專功醫術後母與兄俱醫之而愈母因慨然曰庸醫之悞病多矣允中立藥舖一所活人雖多而卒不索藥資於人康熙六十年間延安大荒斗米五百錢餓莩之跡滿城市母見憐之允中出米二百石半價以恐不能周又設飯於東門之外約費三十餘石樂於有如此者人謂好善之成而不知其承親之志也

南振翼字子雲遊擊南化子年甫十二父歿母子貧無所
依就食瓦窑堡值朱龍之變寇兵突至翼負母逃奔水溝
砦將及砦門已閉翼哀呼救母啟門入其母而追兵已至
身遂爲賊所縛繫於馬尾扯去母見之登砦號痛翼聞母
哭奮不顧身力斷馬尾手指俱裂飛奔歸砦跪慰母曰母
在兒何敢死寇退卽卜居堡中晝則佃力作以奉母夜
則苦讀備極辛苦卒補博士弟子員及母歿哀毀骨立三
年不入寢室生三子長琛次珙俱業儒季子瑾性亦孝友
人以爲有父風

以上縣志

張士恭乾隆七年奉

旌表孝子坊在縣東三十里瓦窰堡

趙芳勲乾隆四十年奉

旌表孝子坊在縣東七十里之湫浴溝

石誌康熙乾隆四十三年奉

旌表孝子坊在縣城東門內以上縣冊

延長縣

金

王晏性至孝父死哀毀大定間旌表縣志

元

張閏八世不異爨家戶餘口無間言口使諸女諸婦各

聚一室爲女紅工畢歛貯一庫室無私藏幼穉啼泣諸母見者卽抱哺一婦歸寧留其子衆婦共乳不問孰爲己兒兒亦不知孰爲己母也閨兄顯卒卽以家事付姪聚聚辭曰叔父行也叔宜主之閨曰姪宗子也姪宜主之相讓既久卒以付聚至元二十八年旌表其門

元史本傳

明

焦繼蘭父早卒母李氏以節著蘭與兄繼芝侍母不離依孺慕母歿廬墓三年里人稱爲純孝嘉靖三十一年知縣雷潔請旌勅建金孝坊

見坊表

董宰歲貢生文行兼優父疾詣城隍廟焚香願減己壽延

父算割左股肉和藥以進父病得愈後歿居喪尤盡禮任
咸陽縣訓導課士以孝友爲先士林景仰之嘉靖二十六
年知縣雷潔請旌表其門曰孝行可風

董彥資維新遺腹子事寡母王氏以孝聞萬歷間學使洪
公給冠帶榮之立匾旌其門

鄭訪聞喜縣丞可薦子定省二人終身無間親歿祭葬盡
禮不御葷酒鄉里莫不化之以拔貢任湖廣荊門州州判
居官以清謹稱

董養勤幼失父事母孝家貧賣餅脯爲生市有鮮菜必先
買以供母崇正五年署知縣簡而文表其門口孝行

李盡教授希孟子事親能備色養崇正年寇至母沉病不能移盡先負父山城至朱家灣見焦孝子墓注曰母病陷於賊我生胡爲遂繼死墓側鄉人哀之爲之立墓表

國朝

蘇芳清里人克盡孝道必告反必面父嗜嗜勸阻每受笞或輸錢芳卽親送聞有逋欠不令父知而清給之父故奉母益篤塋祭皆竭力年七十五時思父母爲脩齊鄉黨公表以明發有懷額乾隆三年建孝思維則坊以垂久云朱大受縣學生敦友愛不私已財其弟大成充庫書失銀大受補賠求免刑杖邑侯張公匾其門曰友同灼艾

蘇帝佐安平里縣學生乾隆十五年公舉孝子雖未邀題
達前邑令製匾以贈

王得榮安平里人仗義疎財當正統八年歲歉得榮出粟
五百石以濟窮民事聞優獎今勅建碑存

毛鶴縣學生天性純孝父鳳彩任三原縣教諭三月而歿
鶴扶襯歸里路遭剽掠艱苦萬狀三年之內寢必異室未
嘗見齒思親哀毀骨立當事以孝行維風區旌之

袁京任靜寧州訓導原任三原縣教諭爾佳之子純孝性
成家貧淡泊自奉甘旨供親父母嘗有疾親嘗湯藥寢不
解衣歿則哭泣哀毀塋祭不留餘力里人化之

建貢生少失所恃父貢生標繼娶建歷事二繼母與
生母等年踰五十孺慕如初閭縣稱爲孝子

以上俱
縣志

宜川縣

唐

司馬芬丹州人事親孝詔旌其門芬辭曰小人有母甘旨
弗能備也方惴惴敢以孝名人益稱之

縣志

明

李端事親以孝閭父仲福疾割以進及卒端居喪僻踊日
一飯惟菜羹事母羅愈謹食必親進母歿合葬廬墓側墓
地高燥乏水端仰天哀籲地忽湧泉有白兔馴擾墓側人

以爲孝感成化二十一年旌表

通志按郡志作保安人疑誤

張友直武子以父死風朝難哀慟自殺時稱父子雙節

焦復榮事親至孝萬歷間旌表李蓋延長庠生崇正末大
寇入城蓋逃至焦孝子塋前泣曰彼人子也我亦人子也

母病不能動何倫生爲遂自縊塋樹而死

舊府志

楊均仁節婦白氏遺腹所生奉母至孝母歿廬墓三年飛
來祥禽宿鳴於苦塊人異之陝西巡按學道皆旌其門

劉翔家杏柴村臨黃河衣巾渡口爲秦晉往來通衢每遇
冬雪必親掃以利行人山西汾州王一元者赴寧夏貿易
過村遺銀二百兩於道翔拾以歸次日遠聞哭聲至則一

國朝

元也細詰得實卽盡給還一元感激每歲逢誕壽日必親詣拜祝村中立有拾金不昧碑子孫昌熾今祀鄉賢劉繼則其子劉子誠則其孫也人咸以爲陰陽之報云

李恭父康熙丁丑進士父歿繼母他適遺弟妹六人撫視如一旣長婚嫁俱成禮中叔兩弟復早逝遺孤歲餘又撫之克底成立同居共爨人無間言通籍後家居杜門尤恥干謁性來學者不拒終浙江景寧令

郝尊圯康熙戊子科舉人貢生炅之子事親孝康熙三十年宜川饑圯徒步往韓城縣負米歸日暮路多虎同伴戒

勿行圯念親饑獨行不輟倦憩道左同伴至見猛虎咆哮
入林中人以爲孝感所致其父疾棘惟囑教弟讀書他無
所言父歿後仲弟論增季弟鵬圯年俱幼圯設父主於書
齋勸課二弟不事嚴威惟以至性相感以故交相奮勵應
童子試前後俱冠軍歲試兄弟迭爲諸生首戊子省試值
秋祭知縣齊宿若聞有讀試榜者曰孝子郝尊圯宜川人
知縣驚起寂無人已而榜發尊圯果中式後兩弟亦相繼
舉于鄉時圯已卧床泣曰兩弟勉旃吾今可見父母于地
下矣尋卒兩弟哀號如失怙恃然祀孝子祠

趙紀歲貢生以孝聞父患風疾有道士指毒蛇可治卽稽

往南山見巨蛇盤臥紀忘其毒徒手捕捉整傷數處持蛇
歸和藥病頓愈視傷處祇流清水旋平復夏月赴鄉聞父
病冒雨驅騾渡澤逕河中流山水陡漲漂流數里爲一巨
石負之登岸至今此石高出水面人以爲異祀孝子祠
王玉成邑諸生事親孝母病癱卧床十餘載侍湯藥頃刻
不離歿後廬墓三年晝夜哀泣儒學訓導王辰綬舉報孝
行

蘇得中人和里吏員有蘭姓道失銀三十兩窘極輕命得
中拾之慨與邑人贈匾曰拾金不昧

呂永清李城里吏員康熙六十年邑饑出粟濟人全活甚

衆

馮玠廩生學優行潔娶膚施進士劉日朝女不久逝玠終身不娶

劉昌祚邑庠生性潔介嚴取與妻早逝守義終身不娶道經狎邪門巷必趨而過之姪受闖逆僞職以絹紬銀兩寄祚怒擲之曰逆姪何以不義物汙我耶年九十餘讀書不倦學使王旌其門曰虞庠上壽給頂帶榮之九十八歲無疾終

郝自行李城里人妻早卒義不再娶年九十八歲強健自如康熙年前知縣孫芳馨給義官頂帶以禮存問表其門

曰

聖代期頤

以上俱縣志

延川縣

明

馬閏天性純孝父早亡廬墓三年養母能順志常以班衣故事慰母母年九十而終哀毀骨立塋祭以禮廬墓時時號泣

王一清庠生早喪母哭泣如成人事繼母與生母等其妻劉亦孝姑病傾奩購藥不解衣者旬日時督學校士諭諸生卷面各書某生德行實蹟閏庠咸註一清孝行無異府

志

鄭可薦官聞喜丞初爲諸生時弟早逝孀婦幼子可薦甚念之衣食必先婦侄而後已有書客寄銀一篋無人知客忽死可薦召其子如數與之人皆義焉萬歷中旌表

王澤性甘淡薄勤誦讀耻爲俗儒歷苜蓿齋高尚其志一介不取萬歷年旌曰直風追古

王好問端方介直時饑荒類仍甘貧不求於人有餽飯者雖受不食歿後啟戶視之飯猶在焉

劉正名少失父母孀居正名善事之以孝行著聞弟正氣齒甚稚正名撫育成立誓不分析知縣表其門

國朝

王光印生員母病劇醫者不審其症光印嘗焚以察之復焚香告天願以身代母病旋愈後享大壽卒光印哀毀骨立廬墓終喪

以上縣冊

梁永建少失所恃奉事繼母與生母并異生養殁葬各竭其力乾隆十九年旌表

定遼縣

明

李應元磚井人事親最孝有遺金者追求其主反之有司欲以孝義聞元固謝人尤歎服

縣冊

庭安府志

卷五十七

孝義

三

靖邊縣

晉

劉殷字長盛新興人七歲喪父哀毀過禮三年未嘗見齒
曾祖母王氏盛冬思董殷時年九歲乃於澤中慟哭頓天
白陳罪 聲不絕者半日於是忽若有人云止聲殷垂淚
視之有董生焉因得斛餘而歸又嘗夜夢人謂曰西籬下
有粟糶而攜之得粟十王鍾銘曰七年粟百石以賜孝子
劉殷自是食之七載方盡郡命主簿州辟從事皆以供養
無主辭不赴司空齊王攸辟爲掾征南將軍羊祜召叅軍
事皆以疾辭同郡張宣子達識之士也嘗曰而今而後吾

子當爲吾師矣遂以女妻之其妻怒曰我女年始十四姿
識如此何慮不得爲公侯配而遽以妻劉殷乎宣子曰非
爾所及也誠其女曰劉殷至孝冥感才識超世此人終當
爲世名公汝其謹事之張氏性亦婉順事王母以孝聞奉
殷如君父焉及王母卒殷夫婦毀瘠幾至滅性時柩在殯
而西鄰失火風勢盛殷夫婦叩殯號哭火遂越燒東家後
有二白鳩巢其庭樹自是名譽彌顯太傅楊駿輔政備禮
聘殷殷以母老固辭駿於是表之優詔遂其高志聽終色
養敕所在供其衣食蠲其徭賦賜帛二百疋穀五百斛趙
王倫篡位孫秀夙重殷名以散騎常侍徵之殷逃奔雁門

及齊王回輔政辟爲大司馬軍諮祭酒轉拜新興太守明
刑旌善甚有政能屬永嘉之亂沒於劉聰聰奇其才而擢
任之累至侍中太保錄尚書事有七子一子各授一經一
子授太史公一子授漢書一門之內七業俱興北州之學
殷門爲盛竟以壽終

延毅志

明

查瑾靖邊學生驍騎將軍兼均之子也美丰姿善騎射從
父任太原時會交城山寇竊發父帥師出擊兵寡爲賊所
窘報至瑾不及甲冒單騎彎弓以出老卒一人繼之突至
賊圍且馳且射格殺數十人遂潰圍救父出父乃乘其馬

瑾步從之賊復合乃邀瑾於絕地父不能顧瑾度弗脫猶
手刃數人力盡死之時年十九也卒名皮成才亦與難妻
袁氏年十八聞凶不食死督撫以其事聞建坊旌表立祠
郭泰字仁度鎮靖人崇正十五年舉人八歲就學過口成
誦年十四補靖邊學生性沉毅善騎射放榜之夕同舍生
以泰年少趣往閱及歸問之無所語有後至者曰郭君儒
矣何勿言於是咸多其器量明年上公車會試改期且知
流賊將入長安念父母亟歸而疾作遂卒子允升亦有文

筆

志通